

LXXXXX

سنة ۱

ایلول ۱۳۳۲

صافی: ۴

دارالفتون

حقوق فائز و لیث محمد علی

حقوق، سیاسیات، اقتصادیات

قسم حقوقی

حقوق اساسی

قوانین اساسیه نك تكونی

(۱)

على العموم حكمدارلرك حرکات عرفیه و كیفیه لریله پائمال ایدیلان حقوق عبادی تأمین ایده بيلمك غایه سنه معطوف اولان قوانین اساسیه بر احتیاج مبهم صورتیله ساحه تطبیقه وضع اولتیجه فیلسوفلر ایله حقوقشناسان مدافع حقوق عباد اولان قانون اساسی یی بر طاقم نظری دساتیر اوزرینه اقعاد ایلك ایستمشلر و جلدلر طولوسی نظریات ایله بدایتنده بر احتیاج مبهم اوزرینه غایت ساده اولمق اوزره تدوین ایدیلان اساساتی ، فرضی ، مغلق بر طاقم دستورلرله ایضاحه قالدشمشلردر .

انكلتره ده ایلك دفعه اولمق اوزره تطبیق اولان دستور اساسی بر فرق نك بر حكمدارك ویا بر كوك محصولی اولدیغی كی فیلسوفلر ایله حقوقشناسانك بعد التأمل وضع ایلدكلی نظریاتك ده بر نتیجه منطقیه سی دكل ایدی . بر طاقم عمیل (pratique) واقعهلر انكلتره یی بووادی به سوق ایتمش و احتیاجات عاجله باش كوستردكجه بونلر انكلیز حقوق عامه سنده بر ایز براقش ایدی . واقعهلر طالعه لر كی ساحله چاربدكجه بر لكده كتیردكلی قومی اوراده براقش لر و عصر لرجه هر كلن یكی طالعه براقدیغی قوم ایله یواش یواش اوراده بیوك بر بیغین یامش و بویله لكه انكلیز قانون اساسیسی حصوله كتیرمشدر .

انكلتره ده مضبوط بر صورتده تكون ایتمش اولان بو قانون اساسی بالطبع انكلیز اخلاق و عاداتیله قابل توفیق اوله بیله جك بر درجه ده حصول پذیر اولمش و چرخ حكومت محور لایقنده دوران ایلكه باشلامش و اهالی ظلم و اعتسافدن تمامیله قورتولمش ایدی . انكلتره ده اهالیك بورقاه و سعادت كوره ن فرانسزلر كندی مملكتلرنده عین اساسی تطبیق ایلك ایستمشلر و انكلتره یی نمونه اتخاذا ایدرك بر طاقم مبدألر (Principes) وضعیله انكلتره ده انكلیز مهندس و آلات و ادواتیله انكلیزلر ایچون قوریلان بو ما كنه یی قوییه ایدرك و ظنلرینه كتیروب فرانسز سیاسیلری و فیلسوفلری ایله ایشلتمك ایستمشلر فقط بر جوق زمانلر چرخ مشروطیت فرانسده انكلتره ده اولدیغی كی تدویر ایدیه مامش ایدی .

بوجەتی ایضا حە کیریشمەن انکلتەرەدە قانون اساسیەك نە صورتە تەكون ایلدیکی
آراشدرمق فائەدەن خالی دکلەر ..

برنجی مقالە مزی یالکەز بوجەتە حصر ایلیە جکەز وایلرودە فرانسه ایله بزم قانون
اساسیمزدن بحت ایلیە جکەز :

انکلیز قانون اساسیسەك برطاقم عمیل واقەلرله احتیاجات مبرمه و عاجلەك تحت
تأثیرندە حصولە کلدیکی بالادە سولشەك .

اوت، انکلیز قانون اساسیسەك تملی اولان و ۱۲۱۵ تاریخندە قرال (ژان سان تەر) دن
اصیلزادگان طرفدن میدان حربەدە قوتلە استحصال اولنان بیوک شارت *grande charte*
(خط) اوتاریخندن اللی آلتش سەئول مشهور باش یسقیوس طوماس بکەت ایله حکمدار
مستبد ایکنجی هازینەك مجادلانەك بر نتیجەسی ، آرسلان یورکلی ریشارک استبدادیئە
قارشو لوندرە بورژووازیسەك کوستردیکی شدتلی مخالفتک بر عکس تأثیری ایدی .

قرال (ژان سان تەر) نورماندیایی غیب ایلدکدن صکرە انکلتەرەدە متمکن اولان
نورماندیایی بارونلر ، قرالرینک سؤ ادارهسیلە نورماندیادەکی مالکانەلرینک الی الابد
ضیاعندن متولد غیظلری قرالک پاپا ایله ۱۲۱۳ تاریخندە وقوعە کلان ائتلافدن صکرە
دەها زیادە اشتداد ایلش ایدی .

بارونلر یقیناً بیلورلر ایدیکە پاپا ایله عقدصلح ایلیان قرال انکلتەرە داخلندە استبدادیئی
تشدید ایدەجک و مملکت داخلندە یکانە صاحب نفوذ اولق ارزو ایلیە جکدی ، قرالک
استبدادیئی قیرمق ایچون مملکت حاضر ایدی . ۱۲۱۴ تاریخندە سن پول کلیسائندە
اجتماع ایلیان کبرای ملت انکلتەرەدەکی نورمان خاندانەك واضع قانونی اولان برنجی
هازینەك وضع ایلش اولدیئی اساسات مئینەیی (ژان سان تەر) مەر قرالی ایله موشح
بر خط ایله رسماً یکیدن موقع تطبیقە وضع ایلیەجک اولور ایسە قرالی سلاخلە اجبار
ایلیە جککریئە آند ایچدیله و ۲۴ مایس ۱۲۱۵ دە لوندرەیی ایکی بیك شووالیە وبرچوق
پیادە و سواری چاووشانی اشغال ایلیەرک قرالە قارشو یوریدیله . (ژان سان تەر) .
ایستەینس Steines ایله ویندسور Windsor اراسندە راست کلدیله و مشارالیهی مغلوب
ایلدکدن صکرە « قونفرانس چایی » Runuymede تسمیە ایدیلان آطەدە « بارونلرک
موادی » Les articles des Barons ایله انکلیز حریاتەك خط کیریندە *Grande charte*
des libertés Anglaises مذکور اولان ارادەلریی قبول ایتدیله . ۱۵ حزیران

۱۲۱۵. قرالك قبوله مجبور اولدينى بو خط برنجى هازرى ، تهتهن و ايكنجى هازرينك حين جلوسلرنده آرزوى شخصيلريه اعلان ايدكلرى خطرله بكنزه ميوردى .
بارونلر طرفندن قراله جبراً قبول ايتديريلان بو خط عادتاً ژان ايله بارونلر آراسنده بر معاهده صورتنده ايدى . حقيقتده اشبو خط ، سابق خطرله دها بيوك بر صراحت ويرييور ايدى :

دره بلكك مالكانه لرينك صورت توارثى ، عنوان اصالتك صورت توجيى ايله نكاح مسائلنى تقين ايليور ، تشكيل محاكم اساسى تعين و جنات محكمه لرينك هراوچ ايدى بر اجتماعى اساسى وضع ايليور و خيلى سؤ استعمال ايدلمش اولان جزاى تقديلى تخفيف ايله رك حرى شخصيه يى حمايه ايليور ايدى ؛ هيچ بر كيسه قانوناً تابع اولدينى محكمه ده محكوم ايدلمكجه توقيف و حبس اولنه مز وهر كسك مال و جانى اميندر دييور ايدى .
تجاره سربست بر صورتده سيروسفرى وعدايليور و مملكتده اوزان و ايكالى توحيد ايليور ، لوندريه ايله شهر ، قصبه ، ليمانلر تجارانك امتيازات تجاريه سنى طانييور ايدى . اصيلزادكان [اسارت ، بيوك كريمه سنك ازدواجى ، بيوك اوغلنك شوواله لك احرازى كى اوچ اساس مستنا اولمق شرطيله] هيچ بروجهله و معاونت ناميله و بر كو طرح و كذا درميان اولتان اوچ اساسدن ماعدا قراليت مجلس عموميسنك اذن و مساعدده سى اولمقسزين اهايلدن دره بلكك و بر كوسى ناميله ده و بر كو آلاميه جقلردى .

هر نقدر اشبو درميان اولتان اساسات ايكنجى هازرى ايله ريشار زماننده ده قبول ايدلمش ايديسه ده خط كبير ، قراليت مجلسنك نه صورتله اجتماعه دعوت ايديله جكنى آيروجه ذكر ايليور و بوييله لكه مجلسك اجتماعى دها زياده تأمين ايليور ايدى . مجلس اعضاسندن بولتان پسقوسلر ايله اصيلزادكانه اسباب موجه لى شخصى بر دعوتنامه كوندريه لك و مجلسك كشادى قونته لرده شريفلر Chériffs واسطه سيله يوم اجتماعدن آلتى هفته اول اعلان اولنه جق و اعضاي سائرده بر بياننامه رسمى ايله دعوت ايديله جكدى . آيلقلى اجنبى عساكرى مملكتدن اخراج ايديله جك ، قرال بارونلر طرفندن منتخب و يكرمى بش اعضادن مركب بر مجلس نظارت تشكيل ايله جك ايدى . شايد قرال ويا مأمورلرندن برى خط كيرده مندرج حرىلردن برينه تجاوز ايله جك اولورايسه يكرمى بش اعضادن مركب اولان مجلس نظارت طرفندن اولجه تعين ايدلمش اولان درت قوميسر طرفندن قراله اخطار واقع اوله جق و فرق كون طرفنده بو خصوصده و يرلسى لازم كلان ترضيه

اعطا ایدلمدیکی تقدیرده قومیسر لر مسئلهی مجلسه عرض ایده جکر مجلسده لزومنده قرالی اجبار ایچون قوه مسلحهیه مراجعت ایده بیله جکدی .

ایشته بوخط کیر انکلتزه تاریخنده یکی بردوره کشاد ایلور وبتون صنوف اهالیی قراله قارشو مدافعه ایلدیکندن کافهسی خط کیرا؛ محافظهسی ایچون برلشمش وقراللقه لزومنده مجادله و حتی مجاهدهیه حاضر نمشدی . مجاهده بر عصر دوام ایتدی فقط بومجاهده ائساننده انکلتزه ننگ وحدت مادی ومعنویسی حصوله کلدی وانکلتزه ننگ حریت سیاسییه بردها ییقلماق اوزره تأسس ایلدی .

(ژان سان تهر) خط کیرک تمامی احکامنی تطبیق ایده جکنه دائر یمن ایلدکن صکره ایلک فرصتدن استفاده ایله خطی الغا ایلدی و بو صورتله یمننه حاث اولدی ، پاپانک حمایه سنه صیغینه رق یمنندن طولای کندیسی عفو وبارونلری آقاروز ایتدیردی . بارونلرک ارمه سنده تحث ایلان براختلافندن ده استفاده ایله رک سلاحه مدافعه نفس وحقوقه قیام ایلدی . اختلاجیلرک لندن مملکتک برچوق اقسامنی ضبط ایلدی فقط لوندیره کیره مدی . اختلاجیلر فرانسه قرالی فیلیدن استمداده بولندیلر . مشارالیه دخی اوغلی لوئی بی بر قوه عسکریه ایله انکلتزهیه کوندردی ، قرال ژان ۱۲ تشرین اول ۱۲۱۶ تاریخنده مغلوباً و مقهوراً وفات ایدرک یرینه اون یاشنده بولان اوغلی اوچنجی هازی جالس تحت پدر اولدی . اختلاجیلر آرتق موفق اولمشلردی . ژان طرفدارانه عنف وشدت کوسترمیه رک آنلری عفو ایلدیلر وخط کیر ۶ تشرین ثانی ۱۲۱۷ تاریخنده ایکنجی دفعه اولمق اوزره اعاده اعلان اولندی . ملت ایله سلطنت اراسنده صلح ارتق تقرر ایتمش ایدی فقط سلطنت اهالییه آرووسی خلافتده برچوق امتیازات بخش ایش اولسندن منفعل بولندیی ایچون ایلروده ینه محاربات داخلیه باشلایه جق وخط کیر ایچون اون اوچنجی عصرده ده برچوق قائلر آقه جتدی . تاریخاً معلوم اولان اشبو وقایعی بتون عنعنایله نقل ایلمک لزومز اولدیغندن بووقایعی تلخیص ایلیه جکر .

اوچنجی هازی سن رشده وصولنده (نهله نونور دو پرووانس) ایله ازواج ایلدی . مقربینک کافهسی فرانسز اولدیغندن بونلر بیوک شارته یعنی خط کیره هیچ بر وجهله حواله سمع واعتبار ایلیه رک آرزولرینه مخالف اولان اقسامنی نقض ایتمکه باشلادیلر . فقط بارونلر بوصورت اداره ننگ اوکنی آلمق ایچون شدید اعتراضاده بولندیلر و اوچنجی هازی بی پدری (ژان سان تهر) کی مشکل بر موقعه قویدیلر .

بارونلر سلاح مدافعه يه صاريله رق بره ييتلى اردو تشكيل ايدوب قرااك انشته سى (سيمون دو مونفور) ك قياتنده رفع لوى عصيان ايلديلر . اوچنجى هازرى قورقوسندن ۱۲۵۸ تاريخنده (اوقسغورد) عهد نامه سى امضالغه مجبور قالدى . بو عهد نامه ايله خط كبرى تصديق ايدرك بتون انكلتره قراللى داخلىنده بولان بارونلر طرفندن انتخاب اولنوب ميعوناً كوندريلان اون بش بارونلر بر مجلس مشاوره عقدى قبول ايلدى وسنده اوج دفعه ده بارون وشوواليه لردن مركب اولان پارلمنتوي رسماً انعقاد دعوت ايلسى ده قرال طرفندن قبول ايديلان شرائط جملهن سندن ايدى .

پدرى كى اوچنجى هازرى ده وضع امضا ايلدكن صكره تعهداتى بوزمغه قالقيشدى بر اردو احضار ايدرك بارونلرله محاربه يه كيريشدى فقط [لهوس] Lewes ده ۱۲۶۴ سنه سنده مغلوب اولدى بارونلرله اسير دوشدى . ۱۲۶۵ سنه سنده مونفور اداره حكومتى اله آله رق بيوك بر پارلمنتو انعقاد ايتيردى . رهبان ، بارون وشوواليه لردن ماعدا هر شهر دن ده ايكي بورژووايى مذكور پارلمنتويه دعوت ايلدى . ايشته بوكون انكليز پارلمنتوسى تشكيل ايلان درت عنصر ك باشلانغيچى بودر .

مونفور ك اداره سى چوق سورمدى . قرااك بيوك اوغلى پرنس ادوار طرفدارانيله فرانسه دن كلان شواليه لرى طوبلادى وسيمون دو مونفورى ئه وشام Evesham ده ۱۲۶۵ مغلوب وپدرى اوچنجى هازرى يى مقامنه اقصاد ايلدى . فقط اوچنجى هازرى ده بوندن صكره انكلتره ده بر حكومت مستبده ريا مطلقه تأسيس ايدم بيلمه نك عديم الامكان اولديغى آكلادى . بارونلرله اوزلاشدى وخلفلى اولان برنجى ايكنجى اوچنجى ادوار زمانلرنده پارلمنتو اصول حسنه سى انكلتره ده يرلشدى .

پارلمنتو دائمى صورتده اداره قرالى يى مراقبه آلتنده بولديرر ايدى . بومراقبه يالكتر قرااك اداره مملكت ايچون هر سنه ايتديكى پاره يى قبول ويارد ايله اجرا ايديلور ايدى . فقط حكومت عوام اله كچمامشدى واون طقوزنجى عصره قدر انكلتره اهالىسى امور مملكت ايله علاقه دار دكلدى پارلمنتو دائمى صورتده رهبان ، بيوك بارونلر ايله كندى اقرانلرى طرفندن منتخب شوواليه وبورژووالردن مركبى .

۱۲۹۵ سنه سنده قرال ادوار وسمنستر Westminster ده بو درت عنصر دن مركب

بور جسم سياسى تشكيل ايلان بر پارلمنتوي جمع ايلدى .

فقط بو درت عنصر كده هر عنصره عايد آيرى آيرى منافعى اولديغى دركار ايدى .

۱۳۰۸ دە رهبان آبروجە عقد اجتماع ایلدیلر ، بارونلر دە شوالیهلرلە آبروجە برلشدیلر .
بورژووالر دە اوچنچی بر قسم اولدیلر کە بویله لکله فرانسه نك (نه تأثره نه رو) Etats généraux
تعبیر ایدیلان مجلس وکلای امتنه مشابه اولدیلر .

۱۳۴۱ سنه سنده یعنی یوز سنه محاربه سنك ابتدالرنده رهبان ایله بارونلر بر آرایه
کلدیلر ولوردلر قارده سی نامنی آلدیلر . و منتخب اولان شووالیهلرلە کذا منتخب اولان بورژووالر
برلشه رك بر ایکنجی مجلس یاپدیلر کە اکاده عوام قارده سی نامی ویرلدی . بوایکنجی قارده ده
شووالیهلر بر خیلی زمان ک مهم رولی اوینادیلر . عوام قارده سی شهرلرک مبعوثلرندن مرکب
اولدینی ایچون ملتک مجلس مبعوثانی اولدی وبوصورتله وکلای امت اداره امور دولته اشتراك
ایلدی . حالبوکه لوردلر قارده سی بر اصیلزادگان محاسی حالنه کیردی وتوارث طریقله بر
قاچ رهبان ایله بارونلر و احفادینه عائد ایدی .

ایشته انکلترة شوتشکیلاتی ایله اداره مطلقه آئنده اداره ایکیلن فرانسه نك قارشوسنده
بر مختاریت اداره بی Self Gouvernement حائز بر حکومت اولدی وحریت سیاسییه ایله
اداره ده کسب مهارت ایلدی . مرکزیت اصولی اورتیه قویان روما حکومتك بر اقامش
اولدینی تعامل قدیم ایله فرانسه کبی مضطرب اولدی . زیرا انکلترة روما بیوندروغی
آئنده پک آزر زمان قالمش وپارلمنتو اصولی ایله حریت شخصییه تربیه سیاسییه آئنه
کیرمش وبو تربیه دهده کیت کیده تکامل ایلمکه باشلامش ایدی .

حریت شخصییه ده ژرمان قبائلنك انکلترة ده بر اقدینی کوزل بر یادکاردرکه ژرمانلر
اسکیدن بری تشکلات سیاسییه لرنده یالکزارک اده سوزینی دیکلر ورئیسلرینك اقوال
و افعالی صره سی کلدیکه باغیرشمله لر ایله تنقید ایلر ویا قالقانلرینك اوزرینه شدتلی ضربه لر
اورده رق قبول ایلرلر ایدی . دیمک کە قرون وسطانك اواخرینه طوغرو انکلترة ایله
فرانسه آره سنده بر برینه ضد ایکی طرز سیاست موجود ایدی . فرانسه ده روما یادکاری
اولان بر حکومت مطلقه ، انکلترة ده اسکی ژرمانلرک یادکاری اولوب ابتدائی بر صورتده
اجرا ایکیلان بر قونترولك بر دولت منتظمه شکله افراغی وحریت شخصییه کافل بر
پارلمنتو اصولی .

زمان قدیمده وکلای امت ایله اداره مملکت اصولی مفقود ایدی . ایشته بو صورت
ایلك دفعه اولمق اوزره انکلترة ده کورولدی . بو طرز حکومت ، حکومت حاضره نك

اساسیه اهلینک حریت شخصیه لرینی کافلدر ، فقط بو طرز حکومت فکر مزجه انکلتزده اولدینی کبی امزجه اهالی یه موافق اولق شرطدر .

انکلتزده ، اطه سنه چکیلش نورماندیالیرک صوک استیلا سندن صکره آوروپانک نفوذ و تأثیراتندن بسبتون آیرلش اولدینی حالده استقبالی تهیه به باشلامش و کن دیسنه ده آوروپانک دیگر اقسامنده کورولیان بر طرز سیاستی ویرمش ایدی . اون اوچنجی عصرده پارلمتونک انکلتزده نه صورتله تشکل ایتدیکنی و صکره نه صورتله پارلمتونک لوردلر و عوام قماره سی نامی تحتنده ایکی یه آیرلدیغی ده بالاده مجملاً "سویلشدک" ، یوز سنه محاربه سی ایتدالرینه طوغری پارلمتو بو حالی المش و اوچنجی ادواردده انکلتزده ملی بر قراللق حصوله کتیرمش ایدی . طرز حکومت ایله تشکل ایدن ملی قراللق انکلتزده یی طریق ترقیده بر سرعت فوق العاده ایله یوروشمش ، انکلتزده حسیات ملیه و قومیه اویانمش ، انکلیزلسانی ، [نورمانلرک یادکاری اولان فرانسزجه قالدقهرق] لسان رسمی و ادبی اولمش ایدی . اوچنجی ادوارد زماننده انکلیز ادبیاتنده کوزل کوزل آثار کورونمکه باشلادیغی کبی محاکمه و بالجمله دوائر رسمیه ده انکلیزجه لسان رسمی اولمش ایدی . بوده انکلتزده (آغلو-ساقون) جنسک اکثریت عظیمه تشکیل ایلدیکنی و آرتق فرانسه اخلاق و عاداتندن انکلتزده ک قورتولق ارزوسنده اولدیغی کوسترر ایدی .

هر قدر یوز سنه محاربه سنده انکلتزده فرانسه ده ضبط ایلدیکی بلده لری محافظه ایلک ایستدی ایسه ده موفق اوله میهرق نهایت اطه سنه چکیدى . انکلتزده ایچون بو عدم موفقیت بلکه بیوک بر موفقیت ایدی . زیرا فرانسه طوپراغنده قالمش اولسه ایدی عجبا روما اخلاق و عاداتندن کندینی اوزاق طوته بیلورمی ایدی ؟ اشته ظن اولنورکه یالکز بو سایه ده انکلتزده ژرمانلرک بر اقدینی اسکی حریت شخصیه قواعدینی صاقلایه بیلدی . انکلیزلر آنجق بو سایه ده هیئت اجتماعی سیاسیه مک بر حاکمک ویا آمرک اوامرینه مطیع و منقاد بر طاقم اسافل ناسدن مرکب دکل ، آنجق حکومتک اجرا آتی ایچلرندن مبعوئاً کوندرکری ذوات ایله دائمی بر مراقبه آلتنده طوتان حر و طیلردن متشکل بر ملتدن عبارت اولدینی فکرینی اویاندیردی .

بو فکر، دولتک بر قوه مطلقه ویا مستبده اوزرینه مبنی اولیوب یالکز حریتک خادمی ، و مرتبی اولدیغی هر کسه اثبات ایلدی و بیله لکه ملی پارلمتونک حاکمیتی اساسی اورتیه قویدی .

انکلتره، بو طرز سیاست ایله بتون انکلیزر آرہ سندنہ ہرنہ قدر بر مساوات سیاسیہ یاپہمدی ایسہدہ غایہ سی اولان بو نقطہ یہ وصول ایچون پک چوق چالیشدی وطریق تکاملی طوتدی. بالطبع قرون وسطادہ کافہ اہالی یہ حقوق سیاسیہ لری استعمال ایتدیرہ بیلیمک عذیم الامکان ایدی، حتی دیہ بیلورز کہ بو جہت ہیچ دوشونیلیمدی فقط تاریخ تمدندہ دہا امثالی کوریلان ایکی اساس موقع تطبیقہ قونمش ایدیکہ بونلرڈہ اک بیوک ترقیاتک ایکی محصولدار تخمی اولدی: وکیللر ایله امور حکومتی تدویر ایلک، ملتہ ویرکونی قبول ایتدیرمک.

وکیللر ایله امور حکومتی تدویر ایتک اصولی ازمئہ قدیمہدہ بالی دکل ایدی. یالکز اسکی آئنہ واسپارطہدہ موانع طبیعیہ ننگ حیولتیلہ اجتماعات عمومیہ یہ کیدہ میان اہل قرا طرفلرندن بعض کیمسہ لری مبعوثاً کوندیر ایدی، فقط اورادہ اساس بتون ملتک اجتماعندہ ایدی، وکیل کوندیرہ بیلیمک شاذ ایدی. انکلتره بو اصولی یعنی بتون افراد ملتی بر آرایہ جمع ایتکی تطبیق ایدہ مزدی زیرا قوص قوجہ مان بر ملتی بر میدانہ طویلا یہ رق منافع مشترکہ سنی موقع مذا کرہ یہ قویمق امکان داخلندہ بولمندیغندن ملتہ منافعنی مذا کرہ ایچون وکیللر تعیین ایتدیرمک اصولی قبول ایلش واون اوچنجی عصردن بری بواسول انکلیز طرز سیاستک اساسی اولش ایدی.

ویرکونک ملت طرفندن قبول ایدلمسی وکیللر ایله ادارہ حکومت طرز مستحسنک چارہ یکانہ سیدر. آنجق بو واسطہ ایله ملت امور حکومتی ادارہ ایدنلرک افعالنی مراقبہ ایلہ بیلور، بو اصول حریت سیاسیہ ننگدہ رکن اعظمیدر. فرانسدہ وکلای امتک قرالہ ویرکونک مقدارینی تعیین حقنی بر اقدینی بر زماندہ انکلتردہ قرون وسطادہ ملت ویرکونسک مقدارینی کنیدیسی تعیین ایلر ایدی.

انکلتردہ پارلمنتو بر چوق زمانلر اصیلزادکان اندہ قالدی. لوردلر قمارہ سی عادتاً قراللرک بر مجلس مشورنی ایدی. انکلتره اصیلزادکانندن اک بیوک اراضی یہ صاحب اولان ذوات ایله انکلتره کلیسائک ایلرو کلانلری لوردلر قمارہ سنی تشکیل ایلور ایدی. عوام قمارہ سی ایسہ شووالہلر، قونسلقلرک زنکین اراضی صاحبیلرلہ شہرلرک بورژوازیسی طرفندن منتخب ایدی.

لوردلر قمارہ سی اون آلتنجی عصرہ قدر فوق العادہ صاحب نفوذ ایدی، حتی دہموقراتیک بر مجلس کبی بر جسارت فوق العادہ ایله حرکت ایدر ایدی. قراللرک

موجودتی پارلمنتونك التده در حكمنی لورلر قساره سی ویرمشدی . ۱۳۹۹ تاریخشدہ
(پلانٹازونہ) خاندانك صوك قرالی اولان ایکنجی ریشاری خلع ایله یرینه (لانقاستر)
خاندانك رئیس اولان دردنجی هازی بی قرال یاپان پارلمنتودر . (لانقاستر) خاندانیله
ایکی کل محاربه طویلہ سنی لوردلر یابدی . بو زمانك اصیلزادكانندن (وارویق)
قرال یایچی عنواتی آلمش وانككترہده کی بو تعامل سیاسینك بر نشانه سی اولق اوزره
« Le parlement fait et défait les rois » دینور ایدی .

ایکی کل محاربه سندن صکرہ انکلیز اصیلزادكانی پك چوق متضرر اولدیلر ، « یورقلر »
اصیلزادكانك برچوق اموالی مصادره ایلدی . (تودور) خاندانی زمانندہ اصیلزادكان
براز استراحت ایدہ جکلرینی امید ایلدیلر ، اصیلزادكانك تعبدن بورژوالر استفاده یه
باشلادیلر . تکامل اقتصادی واجتماعی سایه سنده بورژوالر اصیلزادكان الندن یواش یواش
اقتداری آلمقہ ابتداری ایلدی . بورژوالرك اهمیت و ثروتی تزايد ایلدکجه وکیللرینك عددی
آرتقمقہ باشلامش واصیلزادكانك دورہ اقباللری غروبہ یوز طومش ایدی .

اوج عصر دوام ایدن محاربات خارجیہ و داخلیہ و بو محارباتك انتاج ایلدیکی ضعف
عمومی سایه سنده (تودور) لر انككترہده بر حکومت مطلقہ تأسیس ایتدیلر . برنجی هازی
پارلمنتو امتیازاتی خللدار ایدہ جك بعض نظامات وضع ایلدی . انکلیز قوانینجہ متخذ
اولان (Substitutions) اصولنی (یعنی بیوك مالكانہ صاحبیری وفات ایدنجه میراثك
یالكز بیوك اوغلنه قالمسنی) تغییر ایلدی ، انككترہده اوزمانہ قدر موجود اولان بیوك
مالكانلر بو صورتقہ قابل انقسام اولدیلر . فقط بو قانون مملكتندہ موجود بولنان تعاملی
دكشدرہمدی . Maintenances یعنی اصیلزادكانك منفعت عمومیه لرینی مدافعه ایدہ بیامك
ایچون ایچلرندن برینك تحت ریاستندہ اتحاد و اتفاق ایدہ بیلملرینی قرال منع ایلدی و بو
خصوصده یامش اولدینی قانونه مغایر اوله رق وقوعه كله بیله جك اولان اتفاقلری قانوناً
تعقیب ایدہ بیلمك فكیله بشی قرال طرفندن تعین اولنان یدی اعضادن مرکب (بیلدیزلی
محكمه) بی Chambre étoilée تشکیل ایلدی ، بو محكمه اصیلزادكان اوزرینه قرالك
مدعش بر سلاح قاطعی اولدی . بویله بر محكمه نك تشكلی انككترہده استبدادی
میدانه چیقاردی .

انکلیز قراللرینك بوكی ابداعانه بارونلر سس چیقارمدی ، زیرا اولاملككندہ اوج عصره
قرب بر زمان دوام ایدن محاربات خارجیہ واغتشاشات داخلیه دن پك یورغون

چقمشلردی ، ثانیاً (تودورلر) سایه سنده بر صلح زمانه کیرمشلر ومنفعت ماده لری بو صاحدن مستفید اولمش وینه (تودورلر) سایه سنده مستملکات ایمپراطورلغنک تملی آتلمش ایدی . فقط اصل انکلیرلرک (تودورلر) قارشى بسلامکده اولدقلری حرمتک اساسنی پاپا طرفدارى اولان قاتولیکلرله اولان مجادلات ومحارباتده (تودور) لرک حقیقی بر صورتده انکلیرلرک رئیسى اولملری تشکیل ایلر ایدی .

انکلتره ده آرتق دین سیاست ومحارباتی باشلامش ایدی . قاتولیکلک ایله آغلیقان کلیسائی مجادلاتی بر خیلی زمان دوام ایتدی . نهایت قرالیچه الیزابت آغلیقان مذهبی اعاده ایله عامه نك توجهنی قزاندى . انکلیر کلیسائی یعنی انکلیر حکومتک دینی پارلمنتونک تصدیقنی حاوی اولان بر قانون ایله وضع ایلدى . (تودور) لرله بر ملی قرالیته مالک اولان انکلیرلر (الیزابت) ایله ملی بر دینه مالک اولدیلر . هیچ بر اجنینک امر ونفوذینه تابع اولمیان کلیسایه مظهریتلرندن طولای فوق الغایه اظهار ممنونیت ایلدیلر و وطنپرورلک ایله دینلرنی محافظه یه قالدیلر . (الیزابت) دین محارباتنده اکتساب غایت ایدرک برآ و بحرآ بر چوق مظفریاته نائل اولدی وانکلتره نك کچیرمش اولدیغی او عظیم بحران اثناسنده مملکتک تمثال مشخصی حکمنه کیردی . (الیزابت) زماننده قراللق بحران العاده اکتساب قوت ایلش ایدی فقط انکلیرلر قرالیچه نك خدمات برکزیده سی قارشوسنده مقام حکمدارینک قزاندیغی ، او بیوک اقتدارى کورمه مزلکه کلشلردی . (الیزابت) دن صکره (استوارت) خاندانی اقتدار قرالینک کسب قوت ایلش اولسنی کورونجه فرانسه ده اولدیغی کبی انکلتره ده براداره مستبده قوره بیلیمک فکرینه دوشدیلر . (تودور) لر پارلمنتونک اشتراکیله مسائل دینیده اصلاحات یاپمشلردی . واقعا هر نقدر اکتساب نفوذ ایلش ایدیسه لرده صره سی کلنجه پک چوق دفعه لر تعاملی محافظه ایتشلردی . انکلتره یه آز چوق بر اداره مستبده تطبیق ایتمش ایدیلر . فقط دائماً ظاهراً انکلیر اخلاق وعاداتی حفظ ایلشلردی . مثلاً ۱۶۰۱ تاریخنده (الیزابت) پارلمنتونک مساعدہ سنی استحصال ایتکسزین بعض امتیاز براتلری ویردیکی زمان پارلمنتوده وقوعه کلن شکایات لوندرده هیجانی موجب اولمش ایدی . همان (الیزابت) براتلری استرداد ایدرک عوام قاره سنه منفعت عمومیه حقنده اهتمندن طولای بیان تشکر ایلدى . قرالیچه نك بوحرکتی قلوب عامه یی جلب ایلدى . حالبوکه (استوارت) لرده بو نزاکت کورولدى . انکلتره ، اسقوجیا وایرلاندايه ایلک دفعه تحکم ایدن (برنجی ژاق) کندی عظمت واققدارندن

سر مست اولدی . قوه مطلقه نظریه لرینی غیظ عمومی بی تحریک ایده جک بر در جده ایلرو
سوردی وحقی هنر فروشلق ایدرک « هدیه قرالی » نامنده بر اثر یازدی .

بو کتابده شو جمله لر کورلمکده ایدی :

« دولتلر تشکل ایتزدن اقدم قرال لر موجود ایدی ، بواجلدن قوانین قرال لردن مصدر
اولوب ظن ایدلدیکی کچی قرال لر قوانیندن مصدر دکلدر . قرال تبعه سنک کافه اموال
واملا کنک صاحب یکانه سیدر ؛ قرال تبعه سنک ماملکنی آلمغه صلاحیتداردر فقط تبعه
هیچ بر زمان قرالی خلع ایتکه حق یوقدر . » برنجی ژاقه کوره قرال لر جناب حق طرفدن
ملتره ارسال ایدلش رؤسادر وبو سیدن حاشا قوه الهینک کافه سنی حائزدر . بو نظریه
موجبیجه قراله اطاعت سزلق کناه کبائر دن معدود اولور ؛ قرالک اقتدارینک نه در جده
اولدیغنی آکلایه بیلیمک ایچون مناقشه یه کیریشیمک عادتا کفر عظیمدر . برنجی ژاق
کندی زمان سلطنته قدر انکلترونک تعقیب ایتدیکی مسلکک نام ضدینی طوتیور ایدی .
کریک ژاق وکرک کندی سندن صکره کلن (استوارت) خاندانک افرادی انکلترونک مشروطیت
اداره سنی قالدیره رق آوروپانک سائر دولتلرنده اوزمان موقع تطبیقه اولان اداره مستبدیه بی
قویتمه چالیشدی لر .

(استوارت) خاندانک زمان سلطنتلرنده کچن حادثات ، برنجی (ژاق) ک خلی برنجی
(شارل) ک پدرینک اثرینه اقتفایله اجرا ایدلدیکی استبداد ، وبواستبداده قارشو طوره بیلجه جک
لوردلرک ایکی کل محاربه سنده کی ضعفندن صکره حصوله کلان بورژوازی کی یکی بر عنصرک
موجودیتی ، قرالک پارلمنتو ایله متعدد مجادلاتی پارلمنتونک بر قاچ دفعه لر قرال طرفدن
سدی ، اهالینک ویرکو ویرماملکده کی تغدی ، اسقوچیا کلیسانی انکلترونک کلیسانه جبراً
ربط ایچون وقوعه کلان تشبثات معلوم اولدینی وجهله انکلترونده بر اختلال عظیم
اویاندیردی . قرال لری نه مریوطیتی مسلم اولان انکلیزلری قرال لری علیه آیاقلاندیردی
وبوصورتله استوارت خاندانی دار آغاجی ومنفا ایله کسب معارفه ایلدی لر . پارلمنتو ایله تحت
اراسنده تمدن ایدن بو اختلافاتک کافه سنی غنمه سیله یازمق تطویل مقالی موجب
اوله جفندن صرف نظر ایلورز .

بو اختلال کیرده انکلترونده بر ناصیه پارلادی که اوده مشهور (قروم وول) ک ناصیه سی
ایدی . (قروم وول) برنجی شارلی مغلوب ایلدی و ۱۶۴۹ ده قرالی اعدام ایتدیردی

شمعی قرال اورته دن قانقجه اداره حكومتی تدویر ایتك وظیفه مشكله سی پارلمنتویه
قالدی واورته به بر انكلیز جمهوریتی چیقدی . انكلتره جمهوریت ایله ادارهیه آلیشیق
اولدینی کی حاضرده دكل ایدی . پارلمنتو ریاست امورده معتاد اولدینی وجهه مغلوب و شرائط
ملتی قبول ایتش بر حکمدار کورمك ایستردی . زیرا بویله بر حکمدار انكلتره نك اسکی
حریت سیاسیه سنی محافظه ایتكه کندینی مجبور کورور ایدی . حکومتیز اولان انكلیز
اداره سی یواش یواش بر استبداد عسکری آلتنه کیردی .

(قروم وهل) آمر مطلق کسلیمش ایدی . جمهوریتی قبول ایلمسان ایرلاند الیری
مغلوب ایدرك قتولیکلرك اموال و املا کنی مصادره ایلدی و ایرلاندینی عظیم بر سفاکته
کرفتار ایتدی . انكلتره ده آلآن دوام ایدن ایرلاند مسئله سنی (قروم وهل) آچش
ایدی . « قروم وهل » دشمنلرینی مغلوب ایتدکن صکره قراللرك اللرینی اوزاتمغه جسارت
ایده مدیکی دیگر بر دشمنی قالیور ایدیکه اوده پارلمنتو ایدی . پارلمنتوی طاغیتدی .
وقپوسنه [کیرالق خانه] لوحه سنی آصدیردی و کندیسنه انكلتره نك « حامیسی لورد »
عنوائی ویردی . حامیلکک ایلک دوره سی فوق العاده شرفی اولدی . بر طاقم فتوحات
« قروم وهل » . بر ظفر چلنکی کیدیردی فقط انكلتره فردانک نه اوله جغنی بیلمدیکندن
فوق العاده مضطرب ایدی . « قروم وهل » هیچ بر حکمدارک جسارت ایده مدیکی اداره
مستبده بی مملکتده تطبیق ایلدی یالکز شوراسنی علاوه ایلیمکه « قروم وهل » استبدادینی
مملکتنک استقبالی تأمین ایده جک احوال و موادده اجرا ایلدی . انكلتره اختلاک نتیجه سی
ایسه اعاده سلطنت اوله جقدی .

(قروم وهل) یاپدار اوله بیله جک بر چوق اساسلر وضع ایتك ایستدی . فقط انكلتره نك
اخلاق و عاداتی قرال قفاسی کسمیله اخلاص ایلش ایدی . اولا کندی یاراتدینی بر طاقم
کسانه بر شورای دولت تشکیل ایلدی و آنکه اداره حکومته قالدی . انكلتره کی
سربست مناقشه و مباحثهیه آلیشمش اولان بر مملکتده بوصورت آنحق موقت اوله بیلوردی
قبا و متعصب پروتستانلرك تأثیر نفوذی آلتنده مملکتده بر قانون اساسی پایه بیله جک
بر مؤسسان طوپلادی . فقط بونلرك یامش اولدینی قانون انتخابه طوپلانان مجلس (قروم
و هل) ک ایشنه کلدی آئیده طاغیتدی (۱۶۵۵) .

۱۶۵۶ تاریخنده تأثیر نفوذله طوپلانان ایکنجی بر مجلسده (قروم وهل) ک علیه
چیقدی دیکتاتور مجلس اعضالردن ایستمدکلرینی برر بهانه ایله مجلسدن چقاردی .

مباقی اعضاينه (قروم وهل) ك اوا مرینه منقاد اولدی وتطبیق ایدیلان اداره عسکریه نك
الغاسنه چالیشدی نهایت موفق اولدی . پارلمنتو انكلتره نك بر قراللق اولدیغی ، عوام
قماره سیله لوردلر قماره نك موجودیتی قبول ایتمه مهیا اولدیغی کوستردی . دیکتاتور
چار ناچار سرفرو ایتدی و بر لوردلر قماره سی تشکیل ایتمه راضی اولدی اعضا لری

تعیین ایتدی وبوصورتله انكلتره ده قرالسز بر اعاده سلطنت اولدی .
(قروم وهل) ۱۶۵۸ ده وفات ایتدی . (قروم وهل) انكلیز اختلال کیریخی
مقصندنن چویرمش و بر استبداد عسکری ايله آنی محوایش ایدی . پدرینك وفاتنده حامیلک
عنوانی آلان (ریشار قروم وهل) بر قاج آی صکره بو عنوانی ترک ایلدی . جنرال
مولق قولایجه ایکنجی شارلی انكلتره تختنه دعوت ایلدی .

یکی قرال انكلتره یه کیرمزدن اول (برده دا) بیاننامه سنی نشر ایلدی (۱۶۶۰) . اشبو
بیاننامه ده « پارلمنتوی قراللق اویله اساسلی و مهم بر عضوی اولق اوزره تلقی ایدرزکه
آنسز نه اداره حکومت ممکن اوله بیلور و امیزکه نه قرال نه ده اهالی بختیار بر صورتده
یشایه بیلور » دیبور ایدی . اسکی لوردلر قماره سندن قاله بر فرقه « بیاننامه یه جواب
اوله رق : « انكلتره نك حکومت رسمی و قانونیسی بر قرال ايله ایکی مجلسدن متشکلدر »
دیدی .

دیمك كه انكلتره اختلالی و جمهوریتی هضم ایده مامش واسکی تعاملنه مربوط قالش
اولدیغندن یه ایکی مجلسدن متشکل بر پارلمنتونك قوتترولی آلتنده بولنان بر قرال طرفندن
اداره اولنق ایستدیکنی واضح بر صورتده کوسترمش ایدی . قرال ايله پارلمنتونك مناسباتی
تحدید ایتك اك کوچ بر مسئله اوله جقدی . برنجی اختلال ايله حل اولنه میان بومسئله
ایکنجی بر اختلال ايله حل اوله جقدی .

ا کر (استوارت) لر بو برنجی اختلالك ویرمش اولدیغی درس عبرتدن متنبه اولمش
اوله لردی انكلتره ده بر ملی سلطنت حصوله کتیره بیلورلر ایدی . فقط برنجی شارلاک
ایکی اوغلی ده ۱۶۶۰ دن ۱۶۸۸ سنه سنه قدر بر برینی متعاقب تخت قرالی یه صعود ایلش
وهر ایکیسی ده مفادن کلدکلری ایچون هیچ برشی اوکر نه مشلر و هیچ برشی ده اونوتمه مشلر
ایدی . اولایکرمی بش سنه اجرای حکومت ایلان ایکنجی شارل اختلالدن اخذنار
مقصدیله انكلتره یی بر هول عظیم ایچنه سوقدی . (قروم وهل) ك جسدو میکلیخی تارومار
ایتدی . پدرینك اعدا مند . ذیمدخل اولان رجال سیاسی پی اولد برتدی . کنجلیکنده چکمش

اولدینى زحم و مشاق اونوته بيلمك ایچون کندینى ذوق و صفایه ویردی. سراینك اخلاق و عاداتی انگلیز ناموسنى تهوره کتیردی، و انگلیزلى کوچندیردی و بویه بر حیاتك موجب اولدینى مصارفات پارلمنتوی متأثر ایلدی. قرال ایله پارلمنتو آره‌سنده سؤ تفهم اولاه خفیفجه باشلادی، نهایت کسب شدت ایلدی. بوسؤ تفهمه مسائل دینه‌ده اشتراك ایلدی. ایکنجی شارل فرانسه قرالى اون دررنجی لوی ایله عقد اتفاق ایله‌رك سیاست خارجه‌سنی بو اتفاق اوزرینه بنا ایلدی. قانونيك فرانسه‌زه برلکده پروتستان اولان هولاندا علیهنده بولندی. انگلتره‌ده افکار عمومیه بوندن متأثر اولدی و قرال افکار عمومیه‌نك تأثیریه هولاندايه نهایت یاقلاشمق مجبوریتنده قالدی. قرالک برادر زاده‌سی وانگلتره تاجنك وارثه‌سی اولان ماری دیورق کیلوم دورانز ایله ازدواج ایدنجه (استورات) لرك حرکات نابجاسندن بیقمش اولان انگلیز لر چارچشمه ماری ایله زوجنك انگلیز تخته قعود ایللرینى بکلور ایدی.

قرالک قاردشی ژاق قنوليك مذهبه کیرنجه انگلتره پارلمنتوسی ۱۶۷۳ سنه‌سنده تهست (Test) نامی آلتنده بر قانون وضع ایدرك اوقانون ایله بتون انگلیز مأموریتقه (آنفلیقان) مذهبه صادق قاله جقلرینه دائر یمین تکلیف ایلوردی. بونك اوزرینه انگلیز دونماسی باش قوماندانی اولان ژاق دیورق مأموریتندن استعفا ایله دینى محافظه ایلدی.

۱۶۷۹ تاریخنده دائما استبداددن توحش ایدن پارلمنتو «آبه‌آس قورپوس» *Habéas Corpus* قانونى وضع ایلدی. انگلیز حیات سیاسیه‌نك باشلانغیجی اولان حریت شخصیه بو قانون ایله تأمین ایدیلور ایدی. ذاتاً بیوک شارنك اك مهم ماده‌سنی تشکیل ایلان بومسئله اشبو یكى وضع ایدیلان قانون ایله بکیدن تحت تأمینه آلینور ایدی. بیوک شارت موجبنجه بر سبب قانونی اولدقجه هیچ بر وطنی توقیف ایدیله‌میه‌جك، بر انگلیز قانون دائره‌سنده ابراز اولنه‌جق بر توقیف مذ کره‌سی ایله انجق توقیف ایدیله‌یله‌جك و موقوفك‌ده مطلقاً یكرمى درت ساعت ظرفنده استطاقته باشلانجه‌قدی. ۱۷۶۹ تاریخنده یاییلان قانون بیوک شارنك شو ذکر ایدیلان ماده‌سنه تأمینات اولق اوزره بر ماده ده‌ا علاوه ایلور و دیور ایدیکه غیر قانونی بر صورتده بر انگلیزی توقیف ایلان مأمور همان مأموریتندن عزل ایدیله‌جك و غایت آغیر بر جزای نقدی به چارپيله‌جقدی.

کوریلور که انگلیز استبداده قارشو دائمی بر صورتده سلاحلرینى تجدید ایلور لر و حکمدارلرینه فکرلرینى آکلامق ایستورلردی.

مملکت آیرلند امنیت برکنار کردن حاصل اوله بر هیجان ایچنده ایکن انکلتزده ایکی

بیوک فرقه سیاسیة تشکل ایلدی .

توری « Tories » محافظه کار و « ویغ Whigs » لیبرال یعنی احرارنامی آلتنده تشکل

ایلیان بویکی فرقه بوکونه قدر بر برینه رقابت ایلکده در .

(توری) اسی ایرلاندالی قاتولیکلردن متشکل بر قسم خلک بر آرده کلسندن

تشت ایلشدر . بونلر قاتولیکلکه متایل آنغلیقان مذهبی رؤسانه صداقت کوسرترلردی .

بونلر اکثریسی بیوک چفتاکلر اصحابندن اولوب (استوارت) پولیتیکه سنک مدافع

اولدقلردن (استوارت) لر موقع اقتداردن دوشدکدن صکرده آنلره صادق قالمشلردر .

(ویغ) لر ایسه اسقوجیالی (پره زنی تهرینه) پروتستانلردن متشکلدر . بونلر

اکثریسی بیوک شهرلرده بیوک لیانلرده اکتساب ثروت ایلیان اصحاب تجارت اولان

بورژواوردن تشکل ایدرک پارلمنتونک دائمی مدافع حقوق اولمشلردر . « استوارت » لره

قارشو اعلان حرب ایلیان بونلر اولمشدر . ایلروده بحث ایله جکمز اختلافی « ویغ » لر

حصوله کتیرمش وانکلتزه نك تام بر عصر آمری کیلیمشلردی .

ایشته بو عصر طرفنده اصل پارلمنتو اساسی لایتغر برصورتده انکلتزه ده یرلشدرمشلر

وبویله لکله انکلتزه تاریخ مدیتنده غایت مهم بررول اجرا ایلشلردر .

ایکنجی شارل عمرینک صوک زمانلرنده ینه قاتولیک اولمش و حال احتضارده غایت

حق برصورتله سرایه ادخال ایدمش اولان بر قاتولیک پاپاس طرفندن صوک ترتیبات دینییه

مظهر اولمشدی . برادری و خلقی اولان ایکنجی ژاق ذاتاً اولجه قاتولیک دینته کیرمش

اولدقندن دینی هیچ صاقلاماز اولدینی کبی سرای قرالید قاتولیک آیین روحانیسنه الدن

کلدیکی قدرده رسمیت اعطا ایلر ایدی .

انکلیزلر بکی قرالیرینک بو حالی عادنا کندیلرینه قارشو بر میدان اوقومه فرض

ایلدکلرندن قرالریله محاربهیه کیریشمکه حاضرلندیلر . (استوارت) خاندانه منسوب

قاتولیک واون دردنجی لوئیک پولیتیکه سنک مروجی اولان برانکلیزقرالی انکلیزلر همان اسپانیا

قرالی ایکنجی فیلیپ طرفندن مدافعه اولنان « ماری استوارت » بکنزتدیلر . ذاتاً بویکی

مهم تاریخی زمان آراستهده مشاهیت واردی . ایکنجی ژاق قاتلی جنایت محکمه لری کبی

محاکم فوق العاده لیر ایجاد ایدرک « آبه آس قورپوس » قانونی آیاقلر آلتنه آلدی . « تهست »

قانونی ده کان لمکن حکمنده برافدی . کدیسنک قاتولیک اولمی قرائغه برمانعه اولدینی

ایچون انکلتزده کی قتولیکلره قارشو دائما مسامحه کار طاوران دیقندن قتولیکلر ایچونده غایت مسامحه کار بر بیاننامه نشر ایلدی «۱۶۸۷». انکلیزلر ایکنجی ژاقل اختیار، و خلفنکده «ماری دوراثر» اولدیغنی بیلدکری ایچون سکوت ایدیورلردی. فقط «ماری دوموده ن» ایله ازدواج ایتش اولان ژاقل بر اوغلی دنیایه کانجه انکلیزلر چکمکده اولدقلری اضطرابك الی الابد دوام ایده بیله جکندن قورقغه باشلادیلر .

«ویغ» فرقه سی رؤسای (کیلیوم) دوراثر و حرمی (ماری) ایله مناسباته کیریشه رک کندیلرینی انکلتزیه دعوت ایلدیلر و پارلمتونک کندیلرینه تاج قرالی بی اکسا ایله جکی وعدنده بولندیلر . انکلیزلرک آرزو وخواهش لریله تعامل لرینی تأمین ایده بیله جک اولان اختلال بوصورتله قولایجه چقیویردی .

کیلیوم «قورنوای» ساحلنده کائن «توربه ی» شهرینه اوافق بر قوه عسکریه ایله نازل اولدی . برلکده کتیردیکی اوافق قوه عسکریه کوندن کونه طرفدارلرینک التحاق سایه سنده بیودی «اکستر» شهرینه هیچ بر قوه مانعه یه تصادف ایتکمیزین کیردی . اورادنده لوندره اوزربنه بورودی .

کیلیوم انکلتزه طوراغنه آیق باصدینی دقیقه دن اعتباراً هر رده هر زمان سولیدیکی : « پروتستان دینی ایله انکلتزه ک حریت سیاسی و اساسی سنی محافظه و مدافعه ایله جکم» دن عبارت ایدی .

ایکنجی ژاقل تبعه سی طرفندن ترک ایلدیکی ایچون فراره مجبور اولدی اون دردنجی لوی حقیقه اسکی متفی اولان ژاقه شاهانه بر صورتده مسافر پرورلک وظیفه سنی ایفا ایلدی . حتی ژاقل حقوقی مدافعه ضمتنده بر اردو احضار برده دونما تجهیز ایلدی . بوده تام بر عصر اول اسپانیا فرالی ایکنجی فیلیپک انکلتزه علیه کوندردیکی «آرمادا» یه بکزر ایدی . ایرلاندانک بر کوشه سنه چیقا بیلان بر کوچک فرانسز قوه عسکریه سی کیلیوم طرفندن مغلوب و «لاهوغ» ده بولنان فرانسز دونماسی ده انکلیز دونماسی طرفندن تارومار ایلدی . انکلتزه ده حقوقه انکا ایدرک آرزوسی داخلنده الیه ایلدیکی قرالی حفظ ایلدی .

اولجه حقوق خاندانی بی محافظه ضمتنده تحت قرالینک یالکز ماری ویرلسی و کیلیومکده مظلوم برکوشه ده قرالیچه نك زوجی اوله رق قالمسی ایستیلدی . فقط کیلیوم بوصورتی قبول ایلدی «ویغ» لرده ایشک ایچنده بر اختلال اولدیغنی کوسترمک ویکي قرالک اقتدار

مسئلہ سی میدانہ چیقدی . مسئولیت وکلا ایجابیجہ نظارک کافہ سی هر بر فعل و حرکتی ایچون پارلمتوده اراد سوال واقع اولدیغی حالده جواب ویرمکه ، اکثریتک امنیتی قزانہ مدیغی حالده موقع اقتداردن چکیلیمکه مجبوردرلر . ایشته بواصول سایه سنده حکومت ایله پارلمتو اراسنده موجود بولمسی لازم کلان توازن تامیله حصوله کله مدی ایشده مطلوب اولان توازنه طوغری بر آدم آتیلیمش اولدی : یعنی پارلمتو حکومتی لزومنده دوشوره بیلوردی . ایلروده تکامل نتیجه سنده حکومتکده عوام قماره سنی فسخ ایدیه بیلیمسی اساسی تعامل صورتیله ایشک ایچنه کیردی . ینه بواصولک تکاملی سایه سنده عینی قایینه ناک بتون نظاری پارلمتونک اکثریتی حائز اولدقلری تقدیرده برلکده و بربرلرینک ضامن مشترکی اولدقلری حالده اداره امور ایلرلر و پارلمتونک اعتمادیغی غیب ایتدکلی تقدیرده جمله سی بردن موقع اقتداردن چکیلورلر ایدی .

بوکون حکومت مشروطه ده قبول ایدی لان مسئولیت وکلا اصولی انکلتزده عصر لردنبرو تعامل سایه سنده وضع ایدی لان بواصولدر . انکلتزده (ویغ) و (توری) فرقلری کرک پارلمتوده کرک حکومتده بربرلرینی تعقیب ایدوب طورلر ایدی . بوده آنجق افکار عمومی ایله انتخابات نتیجه سنده ایلر وکلکده ایدی . بو آدن اعتباراً انکلتزده ملتک افکار عمومی سی امور مملکتی تدویره باشلامش ایدی .

۱۸۳۲ سنه سنه قدر انتخاباته اشتراک ایدنلرک عددی محدود ایدی . زیرا اصول انتخاب ناتمام اولدیغندن اسکی قوانین و تعامل مقتضاسیجہ انتخاباته اشتراک ایدیه بیلیمک ایچون بعض امتیازاته مالک اولمق لازم ایدی . انکلتزده قوتلی برآرستوقراسی اداره حکومتی برخیلی زمان کرک بلاواسطه کرک بالواسطه النده طوتدی . انکلز قانون اساسیسی انکلز قومک تکاملیله برلکده تکامل ایتدی ویواش یواش حس اولمیه جق درجه ده واحتیاج اوزرینه ده موقراسی هم پارلمنتوی هم حکومتی اله کچیردی .

اوچنجی کیلیوم ایله ایکنجی مارینک زمان سلطنتریله خلفلری اولان ایکنجی مارینک همشیره سی قرالیچه (آن Anne) ناک سلطنتی زماننده بکی اصول اداره خارجه کی مظفریات ایله کسب قوت ایلدی . کرک فرانسه یه قارشو اکتساب ایدی لان غالبیت ، کرک مظفریات واحوال سائر قرالیچه (آن) ک زمان سلطنتی قرالیچه (الیزابت) ک زمان سلطنته بکزه ندی . بو قرالیچه زماننده فرانسه ناک مستملکات امپراطورلنی پارچالیمغه

باشلادیغی کبی انکلتره نك قوای بحریه و تجارت بحریه سی آرتق تعالی ایتمکه باشلامش و دائمی بر صورتده انکلتره جدی بر سیاست خارجهیه مظهر اولمش ایدی .
 (آن) دائیما رقه برنسیله وقوعبولان ازدواجندن بر وارث دنیایه کتیره مدیکی ایچون برنس دوغال اولان کوچک برادری اوچنجه ژاقی کنديسنه وارث یایمق ارزو ایلدی .
 ایکنجه ژاقک اوغلی اوچنجه ژاق قتولیک قالمش اولدیغندن و ذاتاً بو برنسک یوزندن اختلال ظهوره کلش بولندیغندن پارلمنتو کچن دین محاربه لرینی بر دهها اورتهیه قویه رق قزانیلان مسافه یی غیب ایتمک آرزوسنده دکل ایدی .

۱۷۰۱ تاریخده یاپیلان Acte d'établissement قانونی انکلتره تحت قرالیسنی (استوارت) لرك پروتستان اولان (برونسویك هانور) خاندانه کچیردی . ایشته بوقانون ملتك خاندانه قارشو اولان حق صریحی کوستر . زیر ۱۶۸۹ اختلالنده پارلمنتونك وضع ایلدیکی دیگر بر قانون دهها وار ایدیکه : « انکلتره قوانینی ملتك حق صریحیدر . تحته چیقه حق اولان هر حکمدار موضوع اولان قوانین احکامنه تبعاً اجرای حکومت ایلیه جکدر » دیور ایدی . دیمک که ۱۷۰۱ قانونی بوقاعدهیه بر مثال تشکیل ایلدی .

۱۷۱۴ تاریخده (آن) وفات ایلینجه هانورلی برنجی ژورژ بلا مشکلات انکلتره تحت قرالیسنه صعود ایلدی . هانور خاندانی پارلمنتو اصولنی حرفیاً تطبیق ایلدیلر . زیرا انکلتره تختی انکلیر پارلمنتوسنه بورجلی اولدقلری ایچون پارلمنتونك تفویضی کسر ایلک کندی سلطنتلی علیهنده چالیشمق اولدیغنی پک اعلا آکلادیلر .

عصر لرله دوام ایدوب بوجه بالا اختصار ایلدی کمز احوال انکلتره ده اصول مشروطیتی بردها یرندن اویناماق شرطیه تثبیت ایلش ونهایت انکلیرلر حکمدارلرینه ملتك آرزو واملنی قانی فجیع و متمادی بر مجادله نتیجه سنده قبول ایتدیرمش و ملتك شرائطی قبول ایلش بر حکمدار موقع اقتداره کلش ایدی .

کوریلور که مقاله مزك باشنده سرد و اتیان ایلدی کمز فکری بالایه درج ایلدی کمز وقایع ایله اثبات ایتدک . اک اول قانون اساسی یی تطبیق ایدن و آنکله پک کوزل نتایج استحصال ایلان انکلیرلر نظریاتی بر طرفه بر اقمشله حتی نظریاتک موجودیتی آرامامشله یالکز واقعهیه اهمیت ویرمشله . احتیاج مبهم و عاجلی نظر دفته آلمشله و بالنتیجه حقوق عبادی حکمدارلرک پای استبدادی آلتندن قورتارمشله حتی ایچلرندن چیقان (قروم و مل) ه

قارشى قومیشلر آنك استبداد عسكرى ایله اجرا ایتدیردیكى انتخابات بیله ملتک عزمنه مانع اوله مامش و نهایت (حامی لورد) ده ملتک آرزوسنك اوکنده بیون اكمکه مجبور اولمشدر . ایشته شو کوریلان احوال بزه یقیناً کوستریبور و آکلاتیورکه انکلیزلر برنجی بیوک شارتی کندیلرینك مال صریحی کبی تلقی ایلشدر و آنی غصب ایچون اوزاتیلان اللری کسمشدر و حقوق ملتى اویله بر طاقم نظریات اوزرینه اقعاد ایلیوب یالکیز واقعه یی نظر دفته آلمشدر و کندیلری تکامل ایلدیکه قانون اساسیلرینی قانون تکامله تبعاً تگوین ایلشدر .

حقوق فاکولته سی حقوق اساسیه ومقایسه لی

قوانین اساسیه مدرسی

مهدی الدین عارف

